

दिनांक : 14.05.2026

आकाशवाणी जयपुर-अजमेर
प्रादेशिक समाचार

- रक्षा मंत्री राजनाथ सिंह कह्यो-आतंकवाद रा बारा मांय भारत रो एकदम साफ अर करड़ो रुखं
- राज्यपाल हरिभाऊ बागड़े ईंधन बचावण सारू जनता ऊं खुद री गाड़ियां काम लेवणो कम कर र सार्वजनिक परिवहन ने बधावो देवण बाबत् कह्यो
- चुनाव आयोग वोटर लिस्टां रा पुनरीक्षण रा काम-एस.आई.आर. रा तीजा दौर रो ऐलाण कीनों
- प्रदेश मांय आवता दिनां पारो थोड़ो उतरण रा आसारं

000

इससे पहले, रक्षा मंत्री राजनाथ सिंह कह्यो है के आतंकवाद रे खिलाफ भारत रो रुख एकदम साफ हैं वे आज नागौर जिला रा मेड़ता मांय राव दूदा री मूरत रा अनावरण जळसा मांय बोळ रह्या हां रक्षा मंत्री कह्यो के भारत आतंकवाद रा सर्गां ने मुंहतोड़ जवाब देवण रो बूतो राखे हैं रक्षा मंत्री कह्यो के देश अब सरहद री हिफाजत ऊं जुड़या साज-ओ-सामान रा मामला मांय खुद रे पाण ऊबो व्हे रह्यो हैं वे राजस्थान री जमीं ने वीरभूमि बताता थकां कह्यो के देश री हिफाजत रा काम मांय वठे रा सपूतां रो मोटो योगदान हैं

.....

राजनाथ सिंह महिलावां रा मान ने समाज री तरक्की सारू जरूरी बतायो अर मेड़ता मांय मीरा महोत्सव सारू केंद्र सरकार री ओर ऊं पाँच करोड़ रुपया देवण रो ऐलाण कीनों जळसा मांय मुख्यमंत्री भजनलाल शर्मा कह्यो के राज्य सरकार महापुरुषां री याद मांय पैनोरमा बणा र नुवी पीढी ने इतिहास ऊं जोड़ रही हैं वे कह्यो के सरकार नौजवानां, महिलावां, गरीबां अर किसानां रा भला सारू लगातार काम कर रही हैं

.....

ई पाछे रक्षा मंत्री जोधपुर मांय पैली वाळा उपराष्ट्रपति भैरों सिंह शेखावत री मूरत रो अनावरण कीनों रातानाडा सर्किल माथे राख्यी ज्या जळसा मांय मुख्यमंत्री भजनलाल शर्मा ई मौजूद रह्यां ई मौके श्री सिंह भैरो सिंह शेखावत ने भारत रा लोकतंत्र रो "चालतो-फिरतो विश्वविद्यालय" बताता थकां कह्यो के वां री जिन्दगी जनसेवा अर सादगी री बेहतरीन मिसाल हैं ई मौके मुख्यमंत्री भजन लाल शर्मा कह्यो के भैरोंसिंह शेखावत सियासत ने सेवा रो जरियो बणायो

000

लारला दिनां प्रधानमंत्री नरेन्द्र मोदी कानी ऊं करी ज्यी अपील पाछे राज्यपाल हरिभाऊ बागड़े ईंधन बचावण रा मकसद ऊं वां रा आधिकारिक काफिला मांय गाड़ियां री तादाद कम करण रा हुकम दीना हैं राज्यपाल आज जयपुर हवाई अड्डा ओड़ी जाती बगत आगे चालण वाळी गाड़ी, एम्बुलेंस अर दमकल काम नी लीनां श्री बागड़े जनता ऊं ई खुद री गाड़ियां कम काम लेवण सागे सार्वजनिक परिवहन ने बधावो देवण री अरज कीनीं

काल अलवर जिला मांय न्यारी-न्यारी विकास योजनावां जनता ने संपण रे मौके राख्या जावण वाळा कार्यक्रम मांय केंद्रीय मंत्री भूपेंद्र यादव, अश्विनी वैष्णव अर मुख्यमंत्री भजनलाल शर्मा ई वर्चुअल तरीका ऊं जुड़ेलां ई दौरान भिवाड़ी मांय इलेक्ट्रॉनिक मैन्युफैक्चरिंग क्लस्टर अर सीवेज ट्रीटमेंट प्लांट री सरुआत करी जावेलां ई सागे ई सरे खुर्द पाइप लेण अर टपूकड़ा री सरकारी स्कूल मांय नुवा शैक्षणिक ब्लॉक रो ई उदघाटन कर्यो जावेलां ईंधन बचावण रा बारा मांय जाग जगावण सारू पाली

मांय जिला कलेक्टर रविन्द्र गोस्वामी अर एस.पी. मोनिका सेन आज पैदल चाल र दफतर पूग्यां जिला कलेक्टर सप्ताह मांय एक दिन पैदल या साइकिल ऊं दफतर जावण रो फैसलो कीनो हैं

000

नई दिल्ली मांय एक अर दो जून ने प्रधानमंत्री नरेन्द्र मोदी री सदरत मांय पहलो इंटरनेशनल बिग कैट एलायंस-आई.बी.सी.ए. सम्मेलन राख्यो जावेलां इण री तैयारियां रा सिलसिला मांय केंद्रीय पर्यावरण मंत्री भूपेंद्र यादव आज गुजरात रा सासन गिर मांय 'लायन' स्पीशीज स्पॉटलाइट कार्यक्रम रो उद्घाटन कीनों ई मौके यादव बतायो के आई.बी.सी.ए. रो मकसद बाघ, शेर, तेंदुआ, हिम तेंदुआ, चीता, जगुआर अर प्यूमा सरीखा बिल्ली प्रजाति रा मोटा जिनावरां ने बचावण माथे विचार करणो हैं

000

केंद्रीय कानून मंत्री अर्जुनराम मेघवाल आज बीकानेर जिला रा सुजानदेसर री 40 सरकारी स्कूलां मांय स्मार्ट बोर्ड अर फर्नीचर दीनां हुडको री ओर ऊं करीब सवा करोड़ रुपया रा खर्च ऊं मुहैया करायी ज्या आ साधनां ऊं करीब 15 हजार विद्यार्थियां ने फायदो व्हेलां श्री मेघवाल स्कूल मांय पावर ग्रिड कॉरपोरेशन कानी ऊं बणवाई ज्या नुवा कमरां अर लाइब्रेरी रो ई उद्घाटन कीनों

000

राज्य मांय पड़ रही जोरदार गर्मी बीचे जन स्वास्थ्य अभियांत्रिकी मंत्री कन्हैयालाल चौधरी अहलकारां ने पाणी री परेशानी वाळा हलकां मांय टैंकरां रे जरिए लगातार पाणी री पूर्ति तैय करावण रा हुकम दीना हैं श्री चौधरी आज भीलवाड़ा कने मांडल विधानसभा हलका मांय पीवण रा पाणी ऊं जुडी करोड़ां रुपया रा खर्च वाळी न्यारी-न्यारी परियोजनावां रा काम री नींव रखी अर पूरा व्ह्या काम जनता ने सूंप्यां

ई मौके वे कह्यो के प्रदेश मांय पाणी री व्यवस्थावां ने चोखी बणावण सारू सरकार सगळा ज़रूरी जतन कर रही हैं

000

निर्वाचन आयोग आज वोटर लिस्टां रा विशेष गहन पुनरीक्षण-एस.आई.आर. रा तीजा दौर रो ऐलाण कर दीनों 16 राज्यां अर केन्द्र रा राज वाळा तीन प्रदेशां मांय ओ अभियान चलायो जावेलां

000

प्रदेश मांय जनगणना-2027 रा तैत डिजिटल स्व-गणना रो काम चाल रह्यो हैं पाली जिला मांय देसूरी ब्लॉक रो तिखी गांव स्व-गणना पूरी करण वाळो पहलो गांव बण ग्यो हैं अतिरिक्त जिला कलेक्टर डॉ. बजरंग सिंह आ जाणकारी दीनीं वे बतायो के गांव वाळा शिक्षक उमेश कुमार मेवाड़ा कानी ऊं तकनीकी जाणकारी हासिल कर र मोबाइल रे जरिए खुद पंजीकरण कीनां

000

गृहमंत्री अमित शाह कह्यो है के राष्ट्रीय आपदा मोचन बल-एन.डी.आर.एफ. बीस साल रा कम बगत मांय ई जनता रो भरोसो जीत लीनो हैं वे आज गाजियाबाद मांय एनडीआरएफ रा राष्ट्रपति ध्वज समारोह मांय बोल रह्या हां गृह मंत्री कह्यो के देश मांय किण ई ठौड़ आपदा री सूरत मांय एन.डी.आर.एफ. री मौजूदगी ऊं लोग सुरक्षित महसूस करे हैं वे कह्यो के किण ई सशस्त्र बल ने राष्ट्रपति ध्वज ऊं नवाजणो वां सारू माथो ऊंचो करण री बात व्हे हैं

.....

000

प्रदेश मांय पारो थोड़ो उतरण रा आसार हैं आज अर काल बीकानेर, जयपुर अर भरतपुर संभाग अर शेखावाटी हलका मांय जोरदार बायरो बाजण सागे कठे-कठे हल्की बरसात री संभावना हैं ई पाछे 17 मई ऊं राज्य रा आतूणी हलकां मांय पारो ओजू चढबा रा आसार हैं प्रदेश रा लंकाऊ-ऊगणी हलकां मांय ई तापमान 44-45 डिग्री सेल्सियस रे आरे-सारे रेहवण री संभावना हैं ई बीचे, लारला चौबीस घंटा मांय प्रदेश मांय कठे-कठे बादळां री गाज अर आंधी सागे बारिश व्हीं मौसम केंद्र जयपुर रे मुजब लारला चौबीस घंटां मांय सब ऊं बत्तो तापमान फलौदी मांय 45 दशमलव 2 डिग्री सेल्सियस दर्ज करी ज्यां

000

फौज मांय भर्ती सारू ऑनलाइन कॉमन एंट्रेंस एग्जाम – सी.ई.ई. एक ऊं 12 जून तांई व्हेलां प्रदेश रा 11 शहरां रा 32 केंद्रां माथे व्हेवण वाळी ई परीक्षा रा एडमिट कार्ड काल ऊं आधिकारिक वेबसाइट **ज्वाइन इंडियन आर्मी** ऊं डाउनलोड कर्या जा सकेलां रक्षा जन संपर्क अधिकारी लेफ्टिनेंट कर्नल निखिल धवन आ जाणकारी दीनीं वे बतायो के अजमेर, अलवर, बीकानेर, जयपुर अर जोधपुर समेत प्रदेश रा न्यारा-न्यारा केन्द्रां माथे अग्निवीर, सिपाही फार्मा अर धार्मिक शिक्षक सरीखा न्यारा-न्यारा ओहदां सारू आ परीक्षा ली जावेलां

000

भरतपुर रा केंद्रीय सरसों अनुसंधान केंद्र री ओर ऊं सिखावण शिविर लगा र किसानां ने मृदा स्वास्थ्य कार्ड रा बारा मांय जाणकारी दीरीजीं अनुसंधान निदेशालय रा निदेशक डॉ. विजय वीर सिंह बतायो के मृदा स्वास्थ्य कार्ड रे ज़रिए किसान खेत री मिट्टी मांय नाइट्रोजन, फास्फोरस, पोटेश अर जैविक कार्बन सरीखी चीजां री ठा कर सके हैं शिविर मांय किसानां ने सरसों री उन्नत किस्मां, मिट्टी री जांच, जैविक खेती अर बागवानी प्रबंधन रा बारा मांय ई विगतवार जाणकारी दीरीजीं

000

बुनकरां ऊं जुड़्यो जयपुर ग्रामीण दफ्तर हथकरघा बुनकरां ने ज़िला स्तर रो नकद ईनाम देवण सारू अर्जियां मांगी हैं लारला तीन साल ऊं हथकरघा बुनाई रो काम करण वाळा बुनकर ईनाम सारू अर्जी दे सके हैं अर्जियां काल तांई ज़िला उद्योग केंद्र मांय जमा करायी जा सके हैं

000